

0.0.1 appassutasuttam

1. cattāro'me bhikkhave puggalā santo saṃvijjamānā lokasmiṃ. katame cattāro?
2. appassuto sutena anupapanno, appassuto sutena upapanno, bahussuto sutena anupapanno, bahussuto sutena upapanno.
3. kathañca bhikkhave puggalo appassuto hoti sutena anupapanno? idha bhikkhave ekaccassa puggalassa appakam sutam hoti suttam geyyam veyyākaraṇam gāthā udānam itivuttakam jātakam abbhutadhammam vedallam. so tassa appakassa sutassa na atthamaññāya na dhammamaññāya na dhammānudhammapaṭipanno hoti. evaṃ kho bhikkhave puggalo appassuto hoti sutena anupapanno.
4. kathañca bhikkhave puggalo appassuto hoti sutena upapanno? idha bhikkhave ekaccassa puggalassa appakam sutam hoti suttam geyyam veyyākaraṇam gāthā udānam itivuttakam jātakam abbhutadhammam vedallam. so tassa appakassa sutassa atthamaññāya dhammamaññāya dhammānudhammapaṭipanno hoti. evaṃ kho bhikkhave puggalo appassuto hoti, sutena upapanno.

5. kathañca bhikkhave puggalo bahussuto hoti sutena anupapanno? idha bhikkhave ekaccassa puggalassa bahum¹ sutam hoti suttam geyyam veyyākaraṇam gāthā udānam itivuttakam jātakam abbhutadhammam vedallam. so tassa bahukassa sutassa na atthamaññāya na dhammamaññāya na dhammānudhamma paṭipanno hoti. evaṃ kho bhikkhave puggalo bahussuto hoti, sutena anupapanno.

6. kathañca bhikkhave puggalo bahussuto hoti sutena upapanno? idha bhikkhave ekaccassa puggalassa bahum sutam hoti suttam geyyam veyyākaraṇam gāthā udānam itivuttakam jātakam abbhutadhammam vedallam. so tassa bahukassa sutassa atthamaññāya dhammamaññāya dhammānudhammapaṭipanno hoti. evaṃ kho bhikkhave puggalo bahussuto hoti sutena upapanno.

7. ime kho bhikkhave cattāro puggalā santo samvijaṃānā lokasminti.

appassuto'pi ce hoti
 sīlesu asamāhito,
 ubhayena naṃ garahanti
 sīlato ca sutena ca.

appassuto'pi ce hoti

¹bahukam machasam.

bjt page 016

pts page 008

sīlesu susamāhito,
 sīlato naṃ pasaṃsanti
 tassa sampajjate sutam.

bahussuto'pi ce hoti
 sīlesu asamāhito,
 sīlato naṃ garahanti
 nāssa sampajjate sutam.

bahussuto'pi ce hoti
 sīlesu susamāhito,
 ubhayena naṃ pasaṃsanti
 sīlato ca sutena ca.

bahussutam dhammadharam
 sappaññaṃ buddhasāvakaṃ,
 nekkham jambonadasseva
 ko taṃ ninditumarahati,
 devā'pi naṃ pasaṃsanti
 brahmunā'pi pasaṃsito'ti.